

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Prime Minister Narendra Modi a’n Mann Ki Baat Episode 135-naa ruahtui khawl khawm, tuihna humhalh leh inchunga ruahtui tla dah khawl leh leihnai tui tih tam chungchang a sawi ti hlawhtling turin Mizoramah hmalak mek a ni.
- 2. School Education Minister Dr. Vanlalhlana’n khawpui leh thingtlang kilkhawra zirlaiten khawvel thiamna inang tlang an dawn theih chu an ngai pawimawh a ni a ti.
- 3. High Court thupekin Aizawl Chawnpui venga dan lova in sak 3 chu Police venhimna hnuaiah tihchhiat a ni.
- 4. April atanga June thla chhunga India in rampawna thil a thawnehhuah hlut zawng chu dollar tluklehdingawn 232 hu a tling.

<><><>

CATCH THE RAIN

Prime Minister Narendra Modi a’n Mann Ki Baat Episode 135-naa ruahtui khawl khawm, tuihna humhalh leh inchunga ruahtui tla dah khawl leh leihnai tui tih tam chungchang a sawi ti hlawhtling turin Mizoramah hmalak mek a ni.

Ruahtui khawl khawm beihpui ‘Catch the Rain’ hi District tinah kalpui tur niin hemi chhung hian lo neitute chu tuihna khawl theihna tur khur siam tura tih niin mahni chenna in chung leh tuizem ah te ruahtui tla dah khawl theihna tura chei tha turin sawrkar chuan mipuite a ngen a ni.

Heng bakah hian Office leh Zirna in ah ruahtui khawl khawm bakah tui liam chu leihnuaia a luh theihna turin a remchan ang a ‘recharge pit’ siam zel tur a ni a, hmalakna hi District hrang hranga kalpui ani ang.

<><><>

EDUCATION DEPT & BSNL MoU

School Education Minister Dr. Vanlalhlana’n khawpui leh thingtlang kilkhawra zirlaiten khawvel thiamna inang tlang an dawn theih chu an ngai pawimawh a ti a, tunlai thiamna hmanga zirna inthlau lutuk chu tih bo zel an duh tih a sawi.

Nimina School Education Department leh Bharat Sanchar Nigam Limited (BSNL) ten Mizoram thingtlanga High School-te high-speed internet pekna tur inremna Memorandum of Understanding (MoU) an ziahna ah he thu hi a sawi a, He inremna hi kum 5 chhung awh tur a ni.

Dr. Vanlalhlana chuan thu sawiin Khawpui leh thingtlang kilkhawra zirlaiten khawvel thiamna inang tlang an dawn theih nan leh tunlai thiamna avanga zirnaa inthlauhna (digital divide) awm mek tihbo nan he hmalakna hi a pawimawh hle a ti a, Tunlai khawvelah zirna kaihhnawiha inrelbawlna kalpui nan internet a pawimawh tawh hle tiin, zirtirtute thiamna tihhmasawn nan school hrang hrangah internet rintlak an mamawh thu a sawi.

Thawhhona thuthlung ziaktu School Education Department leh BSNL hotute chuan Mizoram thingtlang school-te thuamchak a, zirlaite leh zirtirtuten tunlai thiamna hmanga digital khawvel nen inthlunzawmna tha zawk an neih theih ngei an beisei a ni.

He thawhona thuthlung hi School Education Department aiawhin Commissioner & Secretary Pu K. Lalthawmmawia leh BSNL aiawhin General Manager Pu BP Meena ten hming an ziak a ni.

<><><>

LMC

Lunglei Municipal Council (LMC) Board of Councillors (BoC) thukhawm chuan LMC huamchhunga parking fee khawn chhuah leh Fine hrang hrangte chu Traffic Warden rawihna atan leh khawpui chhunga thirhrui inthlung hnawk chin felna atan hman anih tur thu an sawi.

Nimina LMC thutkhawmah hian Lunglei khawpui chhunga lirthei chet dan leh hun dan, Traffic leh Vehicle Parking chungchanga an hma lak dan tur rel niin LMC-in lirthei hun man an khawn chhuahte chu phal lohna hmuna lirthei hung leh riahte vil vengtu tur Traffic Warden rawihna atan leh khawpui chhunga thirhrui inthlung hnawk chin felna atan hman a ni dawn tih an sawi.

LMC Chairman Pu Lalzuithanga chuan LMC-in Lunglei khawpui chhunga lirthei hunna felfai leh mipui tana himna kawngah ruahmanna a siam thin thu sawiin lirthei dahna nei lote chu garage siam nan September ni 30 thleng hun an pek thu a sawi a. Local Council te nena thawh hona tur inremna an siam chu a lo tawp tak avangin hma lakna thar an ruahman thu sawiin, mipui harsatna hre thiam chungin ruahmanna an siam tih a sawi.

<><><>

EDUCATION MINISTER

School Education Minister Dr Vanlalhlana’n zirlai naupangten zirna in him leh nuam zawk an neih theih nan school leh hostel endik hna thawh thin chu a pawimawh thu a sawi.

Mizoram State Commission for Protection of Child Rights (MSCPCR) hotute nen nimin khan a pisa-ah inkawmin zirlaite himna leh an chanvo humhalh kawnga Right to Education Act, 2009-in thuneihna MSCPCR a pek anga hmalakna hrang

hrang an neih mekte leh School Education Department-in a thlawp dan turte sawi ho a ni.

Dr Vanlalhlana chuan MSCPCR-in school leh hostel en dik bakah naupangte himna atana POCSO Act chungchang zirtirna an kalpui thinte chu zirlaite tan a pawimawh hle tih a sawi a. MSCPCR-in school hostel leh canteen-a ei leh in hrisel lo chungchangah te leh zirlai naupangte himna an en dik thin chu School Education Department chuan a thlawp tih sawiin an hmalakna chuan zirlai naupangte tan Zirna In him zawk leh nuam zawk a siam ngei a beisei thu a sawi.

He inkawmnaah hian zirlaite rilru leh taksa hriselna bakah sikula naupangte himna pawimawhna sawi ho niin MSCPCR hmalakna hi School Education guidelines leh National Education Policy 2020 nen a inmil avangin School Education Department leh MSCPCR chu chak zawka thawh dun zel an tum a ni.

<><><>

ILLEGAL STRUCTURE DEMOLISHED

High Court thupekin Aizawl Chawnpui venga dan lova in sak 3 chu Police venhimna hnuaiah tihchhiat a ni.

In tichhiat taka cheng chhungkaw 3-te hi kum 2008 vel atanga awm tan an ni a, an chenna hmun chu LSC tumin hmala mah se, an awmna chu mi dang ram a nih avangin phalsak an ni lo a ni.

Kan Correspondent Report ilo ngaithla ang u.

Order-a tihchhuah-ah Civil Judge (Senior Division) - II chuan, he hmun atanga chhuak tura Khingtu (Decree Holder) bakah Deputy Superintendent of Police, Executive Magistrate leh Local Council te chuan July ni 2 khan heng hmun luahtu te hi tha taka chhuak turin an hrilh a, amaherawhchu ram luahtute hi an chhuah duh loh avangin hmalak a ngai tih a tarlang a ni.

He lai hmuna chengte hi a ram neitute leh Revenue Department-in chhuak tura an tih hnuaah an chhuah duh loh avangin ram neitute Court-ah an zualko a, ram neitute chuan thiam chang mah se, chhuak duh lovin High Court-ah an zualko a. High Court chuan thiam loh a chan tir a. Aizawl District Magistrate hnenah an in sakte chu thiat tura thu a pek angin nimin khan thiah a ni.

<><><>

ADB INCEPTION MISSION

Asian Development Bank (ADB) Inception Mission Mizoram thutkhawmah ADB hnuaia Mizoramin Loan a puk tur chu Dollar maktaduai 108 anih thu tarlan a ni.

SAD Conference Hall MINECO-a thutkhawm hi Finance Secretary Pu Ramchuana kaihhruaina hnuaiah neih a ni a, Thutkhawmah hian Finance Department hotute bakah sawrkar mi pawimawh hrang hrang telin ADB hotute hnen atangin ADB hmalakna tur hrang hrang ngaihthlak a ni.

ADB hnuaia Mizoram in loan a puk tur - Loan 4718-IND: Supporting Public Health Care System Strengthening to Achieve Universal Health Care for Mizoram Program pualin he Inception Mission hi neih a ni a. ADB atanga loan puk tur zat hi \$108,000,000 (\$108 Million dollars) a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

LANDSLIDE

Tukin khan Lunglei to Lawngtlai inkar, Tawipui South khuaah leiminin Esther Hotel leh a bul a chenna In 2 a hnawl.

Lungleia kan palai Thanghmingliana Renthlei hnen atanga thudawn danin leimin avang hian helai tan tlanga Lunglei atanga Lawngtlai panna a ping nghal a, kawng chhuat bal anih avangin a tlang hun tur hriat a ni lo a ni.

Leimin hian bungrua zawng zawng deuhthaw a chim pui a, hlahthawn thil a awm vangin nizan lamah he ina cheng te hi an riak chhuak a, mihring thi leh hliam erawh an awm lo niin thudawn a ni.

<><><>

LUNGLEI POLICE

Lunglei District Police Cyber Cell chuan kumin kum chanve chhunga phone bo an hmuh let 64 a neitute kutah an pe let.

Lunglei District hnuaia Cyber Cell, Lunglei Police Station te chuan kumina phone bo report an dawn atangin phone bo 64 chu chhui chhuak tawhin, an hmuh chhuahsak veleh a neitute hnenah an hlan let nghal zel a. Phone bo hmuh let zawng zawng hi a hun lai zela a hlut zawng chu cheng nuai 10.73 (₹10,73,032/-) vel a ni.

Lunglei District SP Pu J. Lalmuankima chuan phone bo report an dawnte chu Cyber Cell te'n ngawrh taka chhui zuiin, an phone hmuh lette a neitute kuta an hlan let nghal bakah, phone bo chungchanga dan bawhchhia man chhuahte chu thubuai siamsak thin an nih thu a sawi a. Phone bo a man phu lova hniama lo leisaktute pawh dan anga thubuai siamsak thin an nih thu sawiin, phone hlui lei kawngah mi tinte fimkhur tur leh hriat chian loh chu lei lo tur te, phone hlui zuar rinhlelhawm an awm chuan a rang lama Police te hriattir thuai thin tur te'n mipuite a chah a ni.

<><><>

EXPORT

April atanga June thla chhunga India in rampawna thil a thawnychhuah hlut zawng chu dollar tluklehdingawn 232 hu a tling.Nikum nena khaikhinin a thanna hi zaa 11.37 a tling tih Union Commerce Minister Piyush Goyal chuan a sawi a. Kumin June thlaa thil thawnychhuah zawng zawng hlutzawng hi US dollar tluklehdingawn 73.4 a tling tih Minister chuan a sawi a. Nikum June thla nena khaikhinin zaa 9.48 a tling tih a sawi a. Thil thawnychhuah ti pungtu ber chu tlereuhte, Engineering goods, organic leh Inorganic chemical, Electronic thil leh buhfai te a ni a ti.

<><><>

EXPRESSWAY

Defence Minister Rajnath Singh leh Unoin Minister for Road Transport and Highway Nitin Gadkari bakah Uttar Pradesh Chief Minister Yogi Adityanath te chuan nimin khan Lucknow-Kanpur Expressswway an hawng. Km 63-a thui 6-lane Lucknow-Kanpur Expressway hian Lucknow leh Kanpur inkar tlan thui zawng chu minute 35 velin a ti tlem dawn a ni. He Expressway bakah hian Lucknow-Hardoi inkar kawngpui siam an hawng bawk a. Heng project te hi a vaiin cheng vaibelchhe 3850 a tling a ni.

<><><>